

आकाशवाणी जयपुर—अजमेर
प्रादेशिक समाचार

- उपराष्ट्रपति जगदीप धनखड़ कहयो—शासन व्यवस्था सारु आजाद अर मज़बूत न्याय प्रणाली ज़रूरी।
- राष्ट्रीय कृमि मुक्ति दिवस रे मौके प्रदेश रा लाखां टाबर—टाबरियां ने एल्बेंडाज़ोल री गोळी दीरीजी।
- हर घर तिरंगा अभियान रा तहत प्रदेश मांय केई कार्यक्रम राख्यी ज्या।
- राज्य रा केई ज़िलां मांय बिरखा रा दौर जारी—जयपुर, अजमेर, कोटा, उदयपुर अर भरतपुर संभाग मांय भारी बारिश रा आसार।

000

उपराष्ट्रपति जगदीप धनखड़ कहयो है के किण ई देश री न्यायिक प्रणाली अर काम करण रो बूतो वां री लोकतांत्रिक जीवंतता ने बतावे है। वे आज जोधपुर मांय राजस्थान हाई कोर्ट री स्थापना री हीरक जयंती रे मौके राख्यी ज्या ज़ल्सा मांय बोल रहया हा। धनखड़ कहयो के शासन व्यवस्था सारु आजाद अर मज़बूत न्याय प्रणाली री ज़रूरत व्हे है। उपराष्ट्रपति कहयो के लोकतंत्र रा तीन खंभां— विधायिका, न्यायपालिका अर कार्यपालिका ने संविधान मांय दिया ज्या दायित्वां ने ईमानदारी ऊं पूरा करणा चाहिजे। उपराष्ट्रपति कहयो के राष्ट्रीय हित ने नी माप्यो जा सके है अर देश रो भलो पैली प्राथमिकता है। वे कहयो के संवैधानिक संस्थावां ने कमज़ोर करण वाळी ताकतां अर लोकतंत्र ने नुकसाण पूगावण वाळा रे खिलाफ़ आवाज उठावणी चाहिजे। देश री बधती माली ताकत रो जिक्र करता थकां उपराष्ट्रपति कहयो के पूरी दुनिया भारत ओड़ी घणी उम्मीद ऊं देख रही है। यू.पी.आई. री कामयाबी रो जिक्र करता थकां वे कहयो के अब केई देश यू.पी.आई रे जरिये लेन—देन करण लाग्या है।

000

राज्यपाल हरिभाऊ किसनराव बागडे आज बाड़मेर ज़िला रो दौरो कीनो। राज्यपाल सरहदी गांव तामलोर मांय विकास रा न्यारा—न्यारा कामां ने देख्या अर जनता सागे बातचीत कीनी। राज्यपाल वठे री स्कूल मांय पौधा रोप्या अर विद्यार्थियां सागे बातचीत कीनी। बागडे मुनाबाव कने पाकिस्तान ऊं लाग्योड़ी सरहद रो दौरो कीनो अर बीएसएफ रा जवानां सागे बातचीत कीनी।

000

चिकित्सा अर स्वास्थ्य मंत्री गजेन्द्र सिंह खींवसर आज नागौर ज़िला मांय बच्चां अर किशोर किशोरियां ने पेट रा कीड़ा मारण री गोळी एल्बेंडाज़ोल खिला र राष्ट्रीय कृमि मुक्ति अभियान री सरुआत कीनी। ई मौके वे कहयो के बच्चां रा स्वास्थ्य रो ध्यान राखणो घणो ज़रुरी है। खींवसर कहयो के बच्चां रे पेट रा कीड़ा खत्म करण सारु सरकार गांव—ढाणी ताँई कृमि मुक्ति अभियान चला रही है। वे कहयो के बच्चां ने छह महीना मांय एक दफा कीड़ा मारण री दवा जरुर खिलावणी चाहिजे। प्रदेश रा सगळा अस्पतालां, स्कूल—कॉलेजां, मदरसां अर आंगनबाड़ी केन्द्रां माथे अ गोळियां मुफ्त दीरीजी। सवाईमाधोपुर ज़िलां मांय मुख्य चिकित्सा अर स्वास्थ्य अधिकारी डॉ. धर्मसिंह मीना मानटाउन बालिका स्कूल मांय टाबरियां ने एल्बेंडाज़ोल री गोळी खिला र ज़िला स्तर रा कार्यक्रम री सरुआत कीनी। झुंझुनूं रा स्कूल—कॉलेजां मांय ई विद्यार्थियां ने अ गोळियां दीरीजी। बालोतरा रा जिला अस्पताल, आंगनबाड़ी केन्द्रां अर स्कूलां मांय ई एल्बेंडाज़ोल री गोळियां दीरीजी। राष्ट्रीय कृमि मुक्ति दिवस रे मौके भीलवाड़ा री गुलमंडी स्कूल मांय मुख्य चिकित्सा अर स्वास्थ्य अधिकारी डॉक्टर चेतेंद्र पुरी गोस्वामी विद्यार्थियां ने एल्बेंडाज़ोल री गोळियां खिला र कार्यक्रम री सरुआत कीनी। जैसलमेर मांय ई पेट रा कीड़ा मारण री दवाई एल्बेंडाज़ोल खिलायी ज्यी। झालावाड़ मांय जिला कलक्टर अजय सिंह राठौड़ मंगलपुरा री लड़कियां री सीनियर सैकेण्डरी स्कूल मांय टाबरियां ने आ गोळी खिला र कार्यक्रम री सरुआत कीनी। अलवर मांय ई बच्चां ने पेट रा कीड़ा मारण री गोळी खिलायी ज्यी। आज गोळी नी खा सक्या बच्चां ने आ गोळी देवण सारु 17 अगस्त ने मॉपअप दिवस मनायो जावेला।

000

मुख्यमंत्री भजनलाल शर्मा आज जयपुर मांय वां रा रेहवास माथे सिकराय विधानसभा हलका री होशियार टाबरियां सागे मुलाकात कीनी। मुख्यमंत्री विधायक विक्रम बंशीवाल री पहल परां हवाई जहाज ऊं अयोध्या दर्शन सारु जा रही होशियार टाबरियां ने आशीर्वाद दीनो। ई मौके मुख्यमंत्री कहयो के

अयोध्या दुनिया रो मोटो आध्यात्मिक अर सांस्कृतिक केन्द्र बण र्यो है, जो म्हाणा देश रा गौरव री निशाणी है। मुख्यमंत्री विधायक विक्रम बंशीवाल री टाबरियां री भणाई ने बधावो देवण सारु करी ज्यी पहल री सराहवणा कीनी।

000

सरकार न्यारा—न्यारा हलकां मांय बेहतरीन काम करण वाळां ने स्वतंत्रता दिवस रे मौके नई दिली मांय राख्या जावण वाळा खास कार्यक्रम मांय सिरकत करण सारु न्यौतो दे रही है। आं मांय पाली ज़िला रा किसान विजय कुमार ई शामिल है।

विजय कुमार, बूसी गांव मांय बूंद—बूंद सिंचाई रा तरीका ऊं अंगूर री उपज लीनी। आकाशवाणी समाचार सागे बातचीत करता थकां विजय कुमार अंगूर री उपज लेवण ऊं जुड़ी मदद करण सारु कृषि विभाग रो धन्यवाद कीनो।

000

हर घर तिरंगा अभियान रा तहत राज्य मांय आज ई केई ठौड़ां तिरंगा रैली निकाळी ज्यी। 15 अगस्त तांई चालण वाळा ई अभियान रा तैत घरां, दुकानां, दफतरां अर सरकारी इमारतां माथे तिरंगो झांडो फहरा र देश रा प्रति मान री भावना रो दरसाव कर्यो जा रह्यो है। **श्रीगंगानगर** मांय महाराजा गंगासिंह चौक ऊं सुखाड़िया सर्किल भारतमाता चौक तांई मोटरसाइकिल रैली निकाळी ज्यी। **पाली** मांय जिला प्रशासन अर स्कूली विद्यार्थियां री ओर ऊं तिरंगा रैली निकाळी ज्यी। रैली मांय जिला कलेक्टर एल.एन. मंत्री अर एस.पी. चूनाराम जाट ई सिरकत कीनी। **भीलवाड़ा** मांय कलेक्ट्रेट परिसर ऊं सूचना केंद्र तांई तिरंगा रैली निकाळी ज्यी। **बांसवाड़ा** मांय हर घर तिरंगा अभियान रा तहत स्कूली विद्यार्थी गांधी सर्कल ऊं साइकिल रैली निकाळी। ई मौके राख्यी ज्या कार्यक्रम मांय संभागीय आयुक्त नीरज के. पवन 13 ऊं 15 अगस्त तांई जनता ऊं घरां माथे तिरंगो झांडो फहरावण री अपील कीनी। **सवाईमाधोपुर** ज़िला मांय निकाळी ज्यी तिरंगा यात्रा मांय विद्यार्थी, अध्यापक अर गांवा वाळा उमाव सागे सिरकत कीनी। **केकड़ी** मांय विद्यार्थी विधायक शत्रुघ्न गौतम, जिला कलेक्टर श्वेता चौहान अर एस.पी. विनीत कुमार बंसल री मौजूदगी मांय तिरंगा यात्रा निकाळी।

000

जयपुर, सीकर अर कोटा समेत राज्य रा 10 जिलां मांय आज संवारे ऊं ई रुक—रुक र मेह बरस रह्यो है। राजधानी जयपुर रा न्यारा—न्यारा हलकां मांय संवारे सरु व्हयो हल्की बारिस रो दौर सिंज्या तांई चालतो रह्यो। जयपुर कने चौमूं मांय 2 घंटा तांई व्ही जोरदार बिरखा पाछे मालेश्वर धाम री डूंगरियां ऊं झरनो बहवण लाग्यो। सीकर जिला रा श्रीमाधोपुर मांय लारला 6 दिन ऊं लगातार मेह बरस रह्यो है। तेज बारिश रे कारण शहर रा जूना बस स्टैंड कने दुकानां मांय पाणी घुस ग्यो। करौली ज़िला रा हिंडौन मांय व्ही मूसलाधार बिरखा ऊं केई हलकां मांय पाणी भर ग्यो। टोंक ज़िला रा शहरी अर गांवांई हलकां मांय ई चोखी बिरखा व्ही। कोटा मांय व्हे रही बिरखा रे कारण संभाग रा घणखर बंधा भर ग्या है। पेश है म्हाणा खबरनवीस री रपट—

.....
डीग ज़िला मांय ई चोखो मेह बरस रह्यो है। डीग मांय बिरखा रे कारण एक मकान ढस जावण ऊं एक ही पिरवार री दो जणियां री मौत व्हे ग्यी। नीम का थाना ज़िला मांय ई जोहड़ मांय भर्या पाणी मांय डूब जावण ऊं एक जणा री मौत व्हे ग्यी। मौसम केंद्र जयपुर रे मुजब आज जयपुर, अजमेर अर कोटा संभाग मांय कठे—कठे घणी ज़ोरदार बारिश व्हेवण रा आसार है। जयपुर, अजमेर, कोटा, उदयपुर अर भरतपुर संभाग मांय आवता पांच—सात दिन तांई चोखो मेह चालतो रेहवण रा आसार है। बीकानेर अर जोधपुर संभाग रा कुछ हलकां मांय आवता 5—6 दिन तांई बारिश व्हेवण री संभावना है। शेखावाटी हलका मांय ई कठे—कठे ज़ोरदार बिरखा रा आसार है।

000

पेरिस ओलंपिक

पेरिस ओलिंपिक रा 15 वां दिन आज महिलावां री फी स्टाइल कुश्ती रा 76 किलोग्राम भार वर्ग मांय भारत री रितिका हूडा ने क्वार्टर फाइनल मांय किर्गिस्तान री मेडेट किज्जी ऊं हार रो सामो करणो पड़्यो। महिलावां री गोल्फ़ होड़ रा चौथा दौर मांय अदिति अशोक आखिरी समाचार मिलण तांई 26 वीं अर दीक्षा डागर 48 वीं ठौड़ माथे चाल रही ही। भारत हाल तांई चांदी रो एक अर कांसा रा 5 तमगा जीत र 69 वीं ठौड़ माथे है।

000

देश ऊं हिफाजती साज ओ सामान दिसावर मांय बेचण रा मामला मांय
मौजूद माली साल री पहली तिमाही मांय लारला माली साल री इण ई
अवधि री तुलना मांय 78 फीसदी रा बधोतरी व्ही है। रक्षा प्रवक्ता ए भारत
भूषण बाबू आ जाणकारी दीनी। वे बतायो के चालू माली साल री पहली
तिमाही मांय देश रा रक्षा निर्यात मांय छह हजार नौ सौ पन्द्रह करोड़ रुप्या
री बधोतरी व्ही। लारला साल री इण ई अवधि मांय तीन हजार आठ सौ
पैंसठ करोड़ रुप्या रो निर्यात करी ज्यो हो।

000